

QUÆSTIO MEDICA

CARDINALITIIS DISPUTATIONIBUS

MANE DISCUTIENDA

IN SCHOLIS MEDICORUM

Die Jovis 19. Martij.

M. ANTONIO DE CAEN.

Doctore Medico, Præside.

Est ne in cibis sumendis ordo servandus?

I.

CIBORUM omnium parens est natura, gula vorax, Medicina præses. Hæc optima vitæ custos, non modo naturam imitatur, cibis ad salutem utilibus homini propositis: verum etiam castigat gulam, dum eorum tantam varietatem dubiis mensis appositam aliquo saltem sumendi ordine reprimit, & minùs noxiam reddit. In quo artis beneficentissimæ officio dubitari potest, utrum minor utilitas reposita sit ad nutritionis probitatem, quam in alimentorum delectu. Ut ut enim quis succi copiam, qualitate, coctionisve facilitate distinxerit id omne, quod calidum, & humidum, suâ substantiæ familiaritate in nostram convertitur. Attamen non mediocrem suæ vitæ injuriam facit, quisquis illud promiscuè haustum, nec institutâ salubri quâdam prioris, ac posterioris ratione dirigit ad caloris nativi, & partium coctioni ministrantium vires. Quod si iniquâ cibi ad eas proportionem, comparationeque

2

offenduntur, pariter titubat, ruitque chyli confectio, & valetudinis conservatio.

II.

UN O ferè ægrotamus, valemusque sanguine, proximo totius corporis alimento, & simplicissimo cuiusque partis instrumento. Ejus originem ab uno corde ducunt, qui cremorem, in quem statim commutantur alimenta, acceptum referunt acido cuidam fermento. In hoc tota esse videtur ætas nostra: ita turgēt, ut in varia hinc inde discedatur doctrinarum divortia de coctionis negotio: quamquam de hoc omnes unā mente, & voce consentiunt, ut existiment nobiscum, talem necessario futurum esse sanguinem, qualis fuerit chylus à primâ coctione ciborum, atque alterum alteri laude responsurum, aut vitio. Ille igitur lacteus liquor, nisi ex ciborum particulis primùm in ore comminutis, ac deinde in ventriculo attritis, omninòque fufis liquefcāt, inde deducitur crudus, plurimàque adhuc crassiorum sordium mole rudis, & impurus. Hanc autem omnem impuritatis labem brevi excipit sanguis, neque unquam deponit, aut secum patitur; quin eam toti deinceps corpori aspergat, nec sinè insigni damno sanitatis, quam propiùs regit, & gubernat.

III.

NI H I L nos alit, nisi vitæ quondam particeps fuerit. Hujus discrimina à plantis, & Animalibus longè quærantur; propiùs verò ab eâ materiæ conditione, ex quâ cibus concrevit multiplex, & diversus: substantiâ quidem, durus, mollis, tenuis, crassus, rarus, densus, asper, lævis, friabilis lentus. Quo peculiari constitutionis nomine æquè inter se discrepat, ac ullâ primarum qualitarum mensurâ. Ab hac materiæ diversitate, non omnis abest affinitas, quæ alimento nobiscum intercedit; sed alia tantummodò, atque alia nascitur hujus ritè coquendi difficultas, aut cocti utilitas minuitur. Quemadmodum enim fugacis molliorisque naturæ fructus *ægru* æstivo sole confecti quàm primùm carpuntur; Autumnales verò crassiores & duriores, diu ex arboribus pendent ad tardiorē maturitatem: Ita etiam

tenerioris concretionis cibi nativo calore facile subacti citius secedunt è ventriculo; dum ei adhuc contumaciùs resistunt, quotquot firmiorem nacti sunt fibrarum texturam. Unde nefas est hos velut coctu difficillimos, illis longè facilioribus præmitti: & singulos inordinato pasci sumi ab eo, qui de coctione tam bene judicare, quàm de suâ salute bene mereri cupit.

IV.

TOTIES ventriculi coctio ex naturæ votis minùs succedit, quoties cibus qualiscùmque in suavem cremoris liquorem conversus, sentit sibi longiorem ad decedendum moram, & impedimentum injici ab alio crudo, qui prior haustus posticis ventriculi foribus pessulum obdit, ut alter diu retentus in hac primâ vitæ officinâ, præter modum torreatur obnoxius corruptioni nusquam emendandæ, ex quâ nausea, præcordiorum dolor, foetidi ructus: Velut gratissima quævis fercula, si diuturniori igne torquentur, pristinam saporis gratiam, aut nidore, aut acore perdunt. Quamobrem ad præcipuam coquendi facilitatem, jura, decocta que carniùm præire debent, solentque carnibus quoruncùmque Animalium: & hæ elixæ suffocatis, suffocata minutim concisis, concisæ assis, aut frixis, assæ denique sale duratis, & fumo. Domesticæ etiam animantes præcedunt agrestes, è quibus montanæ, & aquaticæ aves hanc claudunt vescendi scenam. Herbarum quoque folia primis mensis; turiones, caules, & fructus, quò sunt duriores eò magis servantur secundis, velut boleti, & tubera. Quasi medicina in hoc gulæ veneno nondum adhuc hominis salutem desperaret: dum tardiùs sumi jubet, quicquid frigidius, crassiusve diuturniori indiget ventriculi operâ; non secus ac ei primùm tradi, quicquid temperatius, suâque teneritate comparatius est, ut statim solvatur, solum effluat ad regiam sanguinis viam.

V.

SANITATEM itaque pro edendi voluptate paciscitur, qui uno, eodémque tempore quodlibet esculenti genus devorat, coctum promptum, tardúmve fuit,

quale periculum ferè nemo sibi præcavet à farciminibus, salsamentis, aliisque condimentis, quæ vario rerum diversarum mangonio adulterata, omnem susque deque habent sumendi ordinem. Neque hunc rectè sequitur, quisquis pastum velut ædificium ex crassiore fundat alimenti materiâ: aut mensæ accumbens statim ventriculum, velut utriculum nimio potu distendit, aut dissolvit. Ut enim altero edendi vitio obex interponitur chylo ad exitum paratiori: sic altero deinde, laudabilis quisque cibus fluctuanti agitatione præceps, suam antevertit elaborationem; quàm promovet potus vicissim, & identidem assumptus, ex aquâ ramen salubrior, quàm ex vino saltem meraco. Cujusmodi autem placuerit, ei nec omnino parcendum erit, nec largiùs unquam indulgendum. Verùm quicumque suæ salutis consulat, is plurimâ exercitatione opsonabit famem, non gulæ, aut voluptati quæsitam, sed naturæ. Dum etiam inter epulas alimenta priora sumentur, quæ lubricant alvum; posteriora deinde, quæ eandem astringunt, & nonnunquam temperant. Si quæ præterea conditiones, & eliquamina sunt ancipitis ut plurimum ingenij, hæc quoque, servatâ sui temporis lege diversâ, attingantur; ne pravâ libidine æstuans corpus, peioris aliquando succi redundantiâ magis excandescat.

Est igitur in cibis sumendis ordo servandus.

Asserebat Lutetiæ LUDOVICUS POIRIER,
Richelæus. A. R. S. H. 1676.

PARISIIS,

Apud FRANCISCUM MUGUET, Regis &
Illustrissimi Archiepiscopi Parisiensis
Typographum.